

黃檗山斷際禪師 傳心法要

河東裴休集并序



南無本師釋迦牟尼佛


說 明

本繁體校正版《黃檗山斷際禪師傳心法要》電子書，根據《乾隆大藏經》此土著述第 1567 部，河東裴休集并序《黃檗山斷際禪師傳心法要》原藏影印本校正。句讀僅作參考。

本電子書是免費結緣品。特此說明。

仁慧草堂

二〇一九年三月



掃碼關注仁慧草堂微信公眾號

黃檗山斷際禪師傳心法要

河東裴休集并序

有大禪師，法諱希運，住洪州高安縣黃檗山鷲峯下，乃曹溪六祖之嫡孫，西堂百丈之法嗣。獨佩最上乘離文字之印，唯傳一心，更無別法。心體亦空，萬緣俱寂，如大日輪昇虛空中，光明照曜淨無纖埃。證之者，無新舊，無淺深；說之者，不立義解，不立宗主，不開戶牖，直下便是，動念即乖，然後為本佛。故其言簡，其理直，其道峻，其行孤。四方學徒望山而趨，覩相而悟，往來海眾常千餘人。予會昌二年廉于鍾陵，自山迎至州，憩龍興寺，旦夕問道。大中二年廉于宛陵，復去禮迎至所部，安居開元寺，旦夕受法，退而紀之，十得一二，佩為心印，不敢發揚。今恐入神精義不聞於未來，遂出之，授門下僧太舟法建，歸舊山之廣唐寺，問長老法眾，與往日常所親聞，同異如何也？

時，唐大中十一年十月初八日序

師謂休曰：“諸佛與一切眾生，唯是一心，更無別法。此心無始已來，不曾生，不曾滅，不青不黃，無形無相，不屬有無，不計新舊，非長非短，非大非小，超過一切限量、名言、蹤跡、對待。當體便是，動念即乖。猶如虛空，無有邊際，不可測度。唯此一心即是佛，佛與眾生更無別異。但是眾生着相外求，求之轉失，使佛覓佛，將心捉心，窮劫盡形終不能得。不知息念忘慮，佛自現前。此心即是佛，佛即是眾生。為眾生時此心不減，為諸佛時此心不添。乃至六度萬行河沙功德，本自具足，不假修添，乃遇緣即施，緣息即寂。若不決定信此是佛，而欲着相修行以求功用，皆是妄想，與道相乖。此心即是佛，更無別佛，亦無別心。此心明淨，猶如虛空，無一點相貌。舉心動念，即乖法體，即為着相，無始已來無着相佛。修六度萬行欲求成佛，即是次第，無始已來無次第佛。但悟一心，更無少法可得，此即真佛。佛與眾生，一心無異，猶如虛空無雜無壞。如大日輪照四天下，日升之時，明遍天下，虛空不曾明；日沒之時，暗遍天下，虛空不曾暗。明暗之境自相凌奪，虛空之性廓然不變，佛及眾生心亦如此。若觀佛作清淨、光明、解脫之相，

觀眾生作垢濁、暗昧、生死之相，作此解者歷河沙劫終不得菩提，為着相故。唯此一心，更無微塵許法可得，即心是佛。如今學道人，不悟此心體，便於心上生心，向外求佛，着相修行，皆是惡法，非菩提道。供養十方諸佛，不如供養一箇無心道人。何故？無心者，無一切心也。如如之體，內如木石不動不搖，外如虛空不塞不礙；無能所，無方所，無相貌，無得失。趨者不敢入此法，恐落空無棲泊處故，望崖而退，例皆廣求知見，所以求知見者如毛，悟道者如角。文殊當理，普賢當行；理者真空無礙之理，行者離相無盡之行。觀音當大慈，勢至當大智，維摩者淨名也。淨者性也，名者相也，性相不異，故號淨名。諸大菩薩所表者，人皆有之，不離一心，悟之即是。今學道人，不向自心中悟，乃於心外着相取境，皆與道背。恒河沙者，佛說是沙，諸佛菩薩、釋梵諸天，步履而過，沙亦不喜；牛、羊、蟲、蟻，踐踏而行，沙亦不怒；珍寶馨香，沙亦不貪，糞尿臭穢，沙亦不惡。此心即無心之心，離一切相，眾生諸佛更無差別。但能無心，便是究竟。學道人若不直下無心，累劫修行終不成道，被三乘功行拘繫，不得解脫。然證此心有遲疾，有聞法一

念便得無心者，有至十信、十住、十行、十迴向
乃得無心者；有至十地乃得無心者；長短得無心
者；乃至更無可修可證，實無所得，真實不虛。
一念而得，與十地而得者，功用恰齊，更無深淺，
祇是歷劫枉受辛勤耳。造惡造善皆是着相，着相
造惡枉受輪迴，着相造善枉受勞苦，總不如言下
便自認取本法。此法即心，心外無法；此心即法，
法外無心。心自無心，亦無無心者。將心無心，
心却成有，默契而已，絕諸思議，故曰言語道斷，
心行處滅。此心是本源清淨佛，人皆有之，蠢動
含靈，與諸佛菩薩，一體不異。祇為妄想分別，
造種種業。果本佛上實無一物，虛通寂靜，明妙
安樂而已。深自悟入，直下便是，圓滿具足，更
無所欠。縱使三祇精進修行，歷諸地位，及一念
證時，祇證元來，自佛向上更不添得一物；却觀
歷劫功用，總是夢中妄為。故如來云：‘我於阿
耨菩提實無所得，若有所得，然燈佛則不與我授
記。’又云：‘是法平等，無有高下，是名菩提。’
即此本源清淨心，與眾生、諸佛，世界山河，有
相無相，遍十方界，一切平等，無彼我相。此本
源清淨心，常自圓明遍照，世人不悟，祇認見聞
覺知為心，為見聞覺知所覆，所以不覩精明本體。

但直下無心，本體自現，如大日輪昇於虛空，遍照十方更無障礙。故學道人唯認見聞覺知施為動作，空却見聞覺知，即心路絕無入處，但於見聞覺知處認本心。然本心不屬見聞覺知，亦不離見聞覺知；但莫於見聞覺知上起見解，亦莫於見聞覺知上動念，亦莫離見聞覺知覓心，亦莫捨見聞覺知取法。不即不離，不住不着，縱橫自在，無非道場。世人聞道，諸佛皆傳心法，將謂心上別有一法可證可取，遂將心覓法。不知心即是法，法即是心；不可將心更求於心，歷千萬劫終無得日；不如當下無心，便是本法。如力士迷額內珠，向外求覓，周行十方終不能得。智者指之，當時自見本珠如故。故學道人迷自本心，不認為佛，遂向外求覓，起功用行，依次第證，歷劫勤求永不成道。不如當下無心，決定知一切法，本無所有，亦無所得，無依無住，無能無所，不動妄念，便證菩提。及證道時，祇證本心，佛歷劫功用，並是虛修。如力士得珠時，祇得本額珠，不關向外求覓之力。故佛言：‘我於阿耨菩提實無所得。’恐人不信，故引五眼所見，五語所言，真實不虛，是第一義諦。

“學道人莫疑四大為身，四大無我，我亦無

主，故知此身無我亦無主。五陰為心，五陰無我亦無主，故知此心無我亦無主。六根、六塵、六識和合生滅亦復如是。十八界既空，一切皆空，唯有本心蕩然清淨。有識食、有智食；四大之身，飢瘡為患；隨順給養，不生貪着，謂之智食；恣情取味，妄生分別，惟求適口，不生厭離，謂之識食。聲聞者，因聲得悟，故謂之聲聞。但不了自心，於聲教上起解，或因神通，或因瑞相，言語運動，聞有菩提涅槃，三僧祇劫修成佛道，皆屬聲聞道，謂之聲聞佛。唯直下頓了自心，本來是佛，無一法可得，無一行可修，此是無上道，此是真如佛。學道人，祇怕一念有，即與道隔矣。念念無相，念念無為，即是佛。學道人，若欲得成佛，一切佛法總不用學，唯學無求無着。無求即心不生，無着即心不滅，不生不滅即是佛。八萬四千法門對八萬四千煩惱，祇是教化接引門，本無一切法，離即是法，知離者是佛。但離一切煩惱，是無法可得。

“學道人若欲得知要訣，但莫於心上着一物，言佛真法身猶若虛空，此是喻法身即虛空，虛空即法身。常人謂法身遍虛空處，虛空中含容法身，不知法身即虛空，虛空即法身也。若定言有虛空，

虛空不是法身；若定言有法身，法身不是虛空；但莫作虛空解，虛空即法身；莫作法身解，法身即虛空。虛空與法身無異相，佛與眾生無異相，生死與涅槃無異相，煩惱與菩提無異相；離一切相即是佛。凡夫取境，道人取心；心境雙忘，乃是真法。忘境猶易，忘心至難；人不敢忘心，恐落空無撈摸處，不知空本無空，唯一真法界爾。此靈覺性，無始已來，與虛空同壽，未曾生未曾滅，未曾有未曾無，未曾穢未曾淨，未曾喧未曾寂，未曾少未曾老，無方所無內外，無數量無形相，無色象無音聲，不可覓不可求，不可以智慧識，不可以言語取，不可以境物會，不可以功用到，諸佛菩薩與一切蠢動含靈，同此大涅槃性。性即是心，心即是佛，佛即是法。一念離真，皆為妄想。不可以心更求于心，不可以佛更求於佛，不可以法更求於法，故學道人直下無心，默契而已，擬心即差，以心傳心，此為正見。慎勿向外逐境，認境為心，是認賊為子。為有貪、嗔、癡，即立戒、定、慧；本無煩惱，焉有菩提？故祖師云：‘佛說一切法，為除一切心；我無一切心，何用一切法？’本源清淨佛上，更不着一物。譬如虛空，雖以無量珍寶莊嚴，終不能住；佛性同

虛空，雖以無量功德智慧莊嚴，終不能住；但迷本性，轉不見耳。所謂心地法門，萬法皆依此心建立。遇境即有，無境即無，不可於淨性上轉作境解。所言定慧，鑑用歷歷，寂寂惺惺，見聞覺知，皆是境上作解，暫為中下根人說即得。若欲親證，皆不可作如此見解，盡是境法有沒處，沒於有地，但於一切法不作有無見，即是法也。”

九月一日師謂休曰：“自達磨大師來於中國，唯說一心，唯傳一法。以佛傳佛，不說餘佛；以法傳法，不說餘法；法即不可說之法，佛即不可取之佛，乃是本源清淨心也。唯此一事實，餘二則非真。般若為慧，此慧即無相本心也。凡夫不趣道，唯恣六情，乃行六道。學道人一念計生死，即落魔道；一念起諸見，即落外道。見有生，趣其滅，即落聲聞道；不見有生，唯見有滅，即落緣覺道。法本不生，今亦無滅，不起二見，不厭不忻，一切諸法唯是一心，然後乃為佛乘也。凡夫皆逐境生心，心隨忻厭，若欲無境，當忘其心。心忘即境空，境空即心滅。若不忘心而但除境，境不可除，祇益紛擾。故萬法唯心，心亦不可得，復何求哉？故學般若人，不見有一法可得，絕憶三乘，唯一真實，不可證得。謂我能證能得，皆

增上慢人。法華會上拂衣而去者，皆斯徒也。故佛言：我於菩提實無所得，默契而已。凡人臨欲終時，但觀五蘊皆空，四大無我，真心無相，不去不來，生時性亦不來，死時性亦不去。湛然圓寂，心境一如，但能如是直下頓了，不為三世所拘繫，便是出世人也。切不得有分毫趣向，若見善相諸佛來迎，及種種現前，亦無心隨去；若見惡相種種現前，亦無心怖畏。但自忘心，同於法界，便得自在，此即是要節也。”

十月八日，師謂休曰：“言化城者，二乘及十地等妙二覺，皆是權立接引之教，並為化城。言寶所者，乃真心本佛自性之寶。此寶不屬情量，不可建立，無佛無眾生，無能無所，何處有城？若問此既是化城，何處為寶所？寶所不可指，指即有方所，非真實所也。故云在近而已，不可定量言之，但當體會契之即是。言闡提者，信不具也，一切六道眾生，乃至二乘，不信有佛果，皆謂之斷善根闡提。菩薩者，深信有佛法，不見有大乘小乘，佛與眾生同一法性，乃謂之善根闡提。大抵因聲教而悟者，謂之聲聞；觀因緣而悟者，謂之緣覺。若不向自心中悟，雖至成佛，亦謂之聲聞佛。學道人多於教法上悟，不於心法上悟，

雖歷劫修行，終不是本佛。若不於心上悟，而教法上悟者，即輕心重教，隨成逐塊，忘於本心。但契本心，不用求法，心即法也。凡人多為境礙心、事礙理，常欲除境以安心，併事以存理；不知乃是心礙境、理礙事；但令心空境自空，但令理寂事自寂，勿倒用心也。凡人多不肯空心，恐落於空，不知自心本空。愚人除事不除心，智者除心不除事。菩薩心如虛空，一切俱捨，所作福德皆不貪着。然捨有三等：內外身心一切俱捨，猶如虛空無所取着，然後隨方應物，能所皆忘，是為大捨；若一邊行道布施，一邊旋捨，無希望心，是為中捨；若廣修眾善，有所希望，聞法知空，隨乃不着，是為小捨。大捨如火燭在前，更無迷悟；中捨如火燭在傍，或明或暗；小捨如火燭在後，不見坑窞。故菩薩心如虛空，一切俱捨。過去心不可得，是過去捨；現在心不可得，是現在捨；未來心不可得，是未來捨；所謂三世俱捨。

“自如來付法迦葉已來，以心印心，心心不異。印着空即印不成文，印着物即印不成法，故以心印心，心心不異。能印所印，俱難契會，故得者少¹。然心即無心，得即無得。佛有三身：

¹ 龍藏：少者；大正藏：者少；校勘：者少

法身說自性虛通法，報身說一切清淨法，化身說六度萬行法。法身說法，不可以言語、音聲、形相、文字而求；無所說，無所證，自性虛通而已。故曰：‘無法可說，是名說法。’報身、化身皆隨機感現，所說法亦隨事應根以為攝化，皆非真法。故曰：‘報、化非真佛，亦非說法者。’所言：‘本是一精明，分為六和合。’一精明者，一心也；六和合者，六根也。此六根各與塵合：眼與色合，耳與聲合，鼻與香合，舌與味合，身與觸合，意與法合。中間生六識，為十八界。若了十八界無所有，束六和合為一精明。一精明者，即心也。學道人皆知此，但不能免作一精明六和合解，遂被法縛，不契本心。如來現世，欲說一乘真法，則眾生不信興謗，沒於苦海；若都不說，則墮慳貪，不為眾生普捨妙道，遂設方便說有三乘。乘有大小，得有淺深，皆非本法，故云：‘唯有一乘道，餘二則非真。’然終未能顯一心法，故召²迦葉同法座，別付一心，離言說法，此一枝法令別行，若能契悟者，便至佛地矣。”

問：“如何是道？如何修行？”

師云：“道是何物？汝欲修行。”

² 龍藏：名；大正藏：召；校勘：召

問³：“諸方宗師相承參禪學道如何？”

師云：“引接鈍根人語，未可依憑。”

云：“此既是引接鈍根人語，未審接上根人復說何法？”

師云：“若是上根人，何處更就人覓他？自己尚不可得，何況更別有法當情？不見教中云：‘法法何狀？’”

云：“若如此，則都不要求覓也。”

師云：“若與麼則省心力。”

云：“如是，則渾成斷絕，不可是無也。”

師云：“阿誰教他無？他是阿誰，你擬覓他？”

云：“既不許覓，何故又言莫斷他？”

師云：“若不覓即便休，誰教你斷？你見目前虛空作麼生斷他？”

云：“此法可得便同虛空否？”

師云：“虛空早晚向你道有同有異，我暫如此說，你便向者裏生解。”

云：“應是不與人生解耶？”

師云：“我不曾障你，要且解屬於情，情生則智隔。”

云：“向者裏莫生情是不？”

³ 龍藏：聞；大正藏：問；校勘：問

師云：“若不生情，阿誰道是？”

問：“纔向和尚處發言，為什麼便言話墮？”

師云：“汝自是不解語人，有甚麼墮負？”

問：“向來如許多言說，皆是抵敵語，都未曾有實法指示於人？”

師云：“實法無顛倒，汝今問處自生顛倒，覓甚麼實法？”

云：“既是問處自生顛倒，和尚答處如何？”

師云：“你且將鏡照面自看，莫管他人。”又云：“祇如箇癡狗相似，見物動處便吠，風吹草木也不別。”又云：“我此禪宗，從上相承已來，不曾教人求知求解，只云學道，早是接引之詞。然道亦不可學，情存學解，却成迷道。道無方所，名大乘心。此心不在內、外、中間，實無方所。第一不得作知解，只是說你如今情量處。情量若盡，心無方所，此道天真，本無名字，只為世人不識，迷在情中，所以諸佛出來說破此事。恐汝諸人不了，權立道名，不可守名而生解，故云：‘得魚忘筌，身心自然。’達道識心，達本源故，號為沙門。沙門果者，息慮而成，不從學得，你如今將心求心，傍他家舍，祇擬學取，有什麼得時？古人心利，纔聞一言，便乃絕學，所以喚作

絕學無為閒道人。今時人只欲得多知多解，廣求文義，喚作修行，不知多知多解，翻成壅塞。唯知多與兒酥乳喫，消與不消都總不知，三乘學道人皆是此樣，盡名食不消者。所謂知解不消，皆為毒藥，盡向生滅中取，真如之中都無此事。故云：‘我王庫內無如是刀。’從前所有一切知解，盡須併却令空，更無分別，即是空如來藏。如來藏者，更無纖塵可有，即是破有法王出現世間，亦云：‘我於然燈佛所，無少法可得。’此語只為空你情量知解，但銷鎔表裏情盡，都無依執，是無事人。三乘教網，祇是應機之藥，隨宜所說，臨時施設，各各不同。但能了知，即不被惑。第一不得於一機一教邊守文作解。何以如此？實無有定法如來可說。我此宗門不論此事，但知息心即休，更不用思前慮後。”

問：“從上來皆云：‘即心是佛。’未審即那箇心是佛？”

師云：“你有幾箇心？”

云：“為復即凡心是佛、即聖心是佛？”

師云：“你何處有凡、聖心耶？”

云：“即今三乘中說有凡、聖，和尚何得言無？”

師云：“三乘中分明向你道‘凡聖心是妄’，你今不解，返執為有，將空作實，豈不是妄？妄故迷心，汝但除却凡情聖境，心外更無別佛。祖師西來，直指一切人全體是佛，汝今不識，執凡執聖，向外馳騁，還自迷心，所以向汝道：‘即心是佛。’一念情生即墮異趣，無始已來不異今日，無有異法，故名成等正覺。”

云：“和尚所言‘即’者，是何道理？”

師云：“覓什麼道理？纔有道理便即心異。”

云：“前言無始已來不異今日，此理如何？”

師云：“祇為覓故，汝自異他；汝若不覓，何處有異？”

云：“既是不異，何更用說‘即’？”

師云：“汝若不認凡聖，阿誰向汝道‘即’？即若不即，心亦不心，可中心即俱忘，阿你便擬向何處覓去？”

問：“妄能障自心，未審而今以何遣妄？”

師云：“起妄遣妄亦成妄，妄本無根，祇因分別而有。你但於凡、聖兩處情盡，自然無妄，更擬若為遣他？都不得有纖毫依執，名為我捨兩臂必當得佛。”

云：“既無依執，當何相承？”

師云：“以心傳心。”

云：“若心相傳，云何言心亦無？”

師云：“不得一法，名為傳心。若了此心，即是無心無法。”

云：“若無心無法，云何名傳？”

師云：“汝聞道傳心，將謂有可得也，所以祖師云：‘認得心性時，可說不思議，了了無所得，得時不說知，此事若教汝會。’何堪也？！”

問：“祇如目前虛空，可不是境，豈無指境見心乎？”

師云：“什麼心教汝向境上見，設汝見得，只是個照境底心。如人以鏡照面，縱然得見眉目分明，元來祇是影像，何關汝事？”

云：“若不因照，何時得見？”

師云：“若也涉因，常須假物，有什麼了時？汝不見他向汝道：‘撒手賜君無一物，徒勞謾說數千般。’”

云：“他若識了，照亦無物耶？”

師云：“若是無物，更何用照？你莫開眼寐語去。”

上堂云：“百種多知，不如無求最第一也。道人是無事人，實無許多般心，亦無道理可說。

無事散去！”

問：“如何是世諦？”

師云：“說葛藤作什麼？本來清淨，何假言說問答？但無一切心，即名無漏智。汝每日行住坐臥一切言語，但莫着有為法，出言瞬目，盡同無漏。如今末法向去，多是學禪道者，皆着一切聲色，何不與我心同虛空去，如枯木石頭去，如寒灰死火去，方有少分相應。若不如此，他日盡被閻老子拷你在。你但離却有無諸法，心如日輪常在虛空，光明自然不照而照，不是省力底事。到此之時無棲泊處，即是行諸佛行，便是應無所住而生其心。此是你清淨法身，名為阿耨菩提。若不會此意，縱你學得多知，勤苦修行，草衣木食，不識自心，盡名邪行，定作天魔眷屬。如此修行，當復何益？志公云：‘佛本是自心作，那得向文字中求？’饒你學得三賢四果、十地滿心，也祇是在凡聖中坐。不見道：‘諸行無常，是生滅法。’‘勢力盡，箭還墜，招得來生不如意。爭似無為實相門，一超直入如來地。’為你不是與麼人，須要向古人建化門廣學知解。志公云：‘不逢出世明師，枉服大乘法藥。’你如今一切時中行住坐臥，但學無心，久久須實得。為你力量小，

不能頓超。但得三年、五年、或十年，須得箇入頭處自然會去。為汝不能如是，須要將心學禪學道，佛法有甚麼交涉？故云：‘如來所說皆為化人。’如將黃葉為金，止小兒啼，決定不實。若有實得，非我宗門下客，且與你本體有甚交涉？故經云：‘實無少法可得，名為阿耨菩提。’若也會得此意，方知佛道、魔道俱錯。本來清淨皎皎地，無方圓，無大小，無長短等相，無漏無為，無迷無悟，了了見無一物，亦無人，亦無佛，大千沙界海中漚，一切聖賢如電拂，一切不如心真實，法身從古至今，與佛祖一般，何處欠少一毫毛？既會如是意，大須努力，盡今生去，出息不保入息。”

問：“六祖不會經書，何得傳衣為祖？秀上座是五百人首座，為教授師，講得三十二本經論，云何不傳衣？”

師云：“為他有心，是有為法，所修所證，將為是也，所以五祖付六祖。六祖當時祇是默契，得密⁴授如來甚深意，所以付法與他。汝不見道：

‘法本法無法，無法法亦法，今付無法時，法法何曾法？’若會此意，方名出家兒，方好修行。

⁴ 龍藏：蜜；大正藏：密；校勘：密

若不信，云何明上座走來大庾嶺頭尋六祖，六祖便問：‘汝來求何事？為求衣？為求法？’明上座云：‘不為衣來，但為法來，’六祖云：‘汝且暫時斂念，善惡都莫思量。’明乃秉語。六祖云：‘不思善，不思惡，正當與麼時，還我明上座父母未生時面目來！’明於言下忽然默契，便禮拜云：‘如人飲水，冷暖自知，某甲在五祖會中，枉用三十年工夫，今日方省前非。’六祖云：‘如是！’到此之時，方知祖師西來，直指人心，見性成佛，不在言說。豈不見阿難問迦葉云：‘世尊傳金襴外，別傳何法？’迦葉召阿難，阿難應：‘諾！’迦葉云：‘倒却門前剎竿着。’此便是祖師之標榜也。甚生阿難三十年為侍者，祇為多聞智慧，被佛訶云：‘汝千日學慧，不如一日學道。’若不學道，滴水難消！”

問：“如何得不落階級？”

師云：“但終日喫飯，未曾咬着一粒米；終日行，未曾踏着一片地。與麼時無人、我等相，終日不離一切事，不被諸境惑，方名自在人。更時時念念不見一切相，莫認前後三際，前際無去，今際無住，後際無來，安然端坐，任運不拘，方名解脫。努力！努力！此門中千人萬人，只得三

箇五箇，若不將為事，受殃有日在。故云：‘着力今生須了却，誰能累劫受餘殃。’”

傳心法要（終）

南无护法韦驮尊天菩萨



此咒置經書中可滅誤跨之罪